

Terima	Wasit	Muatnaik e-Jurnal
24 MAC 2022	15 APR 2022	31 MEI 2022

## **Isu Kontemporari Produk Kecantikan dan Kesihatan Mengikut Undang-Undang Negara Brunei Darussalam.**

### **Contemporary Issues of Beauty and Health Products According to Laws of Brunei Darussalam.**

Adee Aiman bin Haji Muhidin<sup>1</sup>

#### **ABSTRAK**

*Pengeluaran produk-produk kecantikan dan kesihatan telah banyak dihasilkan mengikut peredaran zaman, persaingan perniagaan dan produk yang semakin tinggi dalam dunia pemasaran sehinggakan ramai pembeli atau pengguna terpedaya dengan produk yang telah dihasilkan tanpa meneliti terlebih dahulu akan keselamatan produk tersebut dari sudut kualiti, tahap keberkesanan dan keaslian produk. Seramai tiga orang pengusaha perniagaan dan tiga pegawai dari pihak agensi kerajaan telah dipilih dan dimasukkan sebagai sampel dalam kajian ini. Kajian ini menggunakan kaedah kualitatif (secara temu bual) dengan menggunakan sumber primer di mana pengkaji sendiri turun ke lapangan, di mana segala bahan-bahan sumber maklumat dan data kajian tersebut diperolehi dan dipungut sendiri. Objektif Kajian bertujuan mengenal pasti tentang Isu Kontemporari Produk Kecantikan dan Kesihatan Mengikut Undang-Undang Negara Brunei Darussalam dari sudut prosedur yang perlu diikuti dari awal pegimportan sehingga pemasaran produk, tugas dan tanggungjawab serta peranan setiap agensi kerajaan dan bukan kerajaan dan juga mengenai denda-denda yang boleh dikenakan terhadap pesalah jika sabit kesalahan ke atas penjualan produk ubat-ubatan dan kosmetik yang di tegah di Premis Perniagaan dan Media Sosial, di bawah Perintah Ubat, 2007. Secara keseluruhan hasil dapatan kajian menunjukkan bahawa Pasukan Polis Diraja Brunei, Jabatan Kastam dan Eksais Diraja dan Brunei Darussalam Food Authority, Kementerian Kesihatan adalah agensi kerajaan yang terlibat dalam mengawalselia produk yang masuk ke Negara Brunei Darussalam. Maklumat-maklumat risikan daripada orang ramai atau secara tular di media sosial dan agensi bukan kerajaan adalah memainkan peranan penting dalam menguatkan kerjasama di antara agensi-agensi yang berkepentingan. Pihak Kementerian Kesihatan (melalui Lembaga Perubatan Brunei atau lebih dikenali dengan 'Brunei Medical Board') yang selalunya giat membuat pemantauan dan penyiasatan awal ke atas aktiviti-aktiviti yang menyalahi undang-undang berkaitan produk kecantikan dan kesihatan akan memanggil pihak Pasukan Polis Diraja Brunei (PPDB) untuk membincangkan dan membuat Pelan Operasi bagi mengadakan Operasi Sepadu dan menjalankan siasatan ke atas pesalah-pesalah yang berjaya ditahan.*

**Kata Kunci:** isu kontemporari, produk kecantikan dan kesihatan, undang-undang Negara Brunei Darussalam.

#### **ABSTRACT**

*The production of beauty and health products has been widely produced with the passage of time, business competition and products are increasing in the world of marketing so that many*

<sup>1</sup> Adee Aiman bin Haji Muhidin, Sarjana Dalam Halal Sains (Undang-Undang Halal) Secara Penyelidikan, Universiti Islam Sultan Sharif Ali, Hadee.masterunissa@gmail.com

*buyers or consumers are deceived by the products that have been produced without examining the safety of the product in terms of quality, effectiveness and product authenticity. A total of three business entrepreneurs and three officials from government agencies were selected and included as a sample in this study. This study uses a qualitative method (by interview) by using primary sources where the researcher himself goes down to the field, where all the information source materials and data of the study are obtained and collected themselves. The objective of the study aims to identify the Contemporary Issues of Beauty and Health Products under the Laws of Brunei Darussalam in terms of procedures to be followed from the beginning of importation to marketing of products, duties and responsibilities and roles of each government and non-government agencies and also the fines that can be imposed on offenders under the Medicines Order, 2007. The findings of the study showed that the Royal Brunei Police Force, Royal Customs and Excise Department and the Brunei Darussalam Food Authority, the Ministry of Health are the government agencies involved in regulating products from entering Brunei Darussalam. The information from the public on social media and non-governmental agencies plays an important role in strengthening cooperation between interested agencies. The Ministry of Health (through the Brunei Medical Board or better known as the 'Brunei Medical Board') which is always actively monitoring and investigating illegal activities related to beauty and health products will call the Royal Brunei Police Force (PPDB) to discuss and make an Operational Plan to conduct Integrated Operations and conduct investigations on offenders who have been arrested.*

**Keywords:** *contemporary issues, beauty and health products, the laws of Brunei Darussalam*

## **Pendahuluan**

Negara Brunei Darussalam adalah juga merupakan sebuah negara yang menjalankan sistem pemerintahan monarki mutlak dan mengamalkan dua sistem undang-undang iaitu undang-undang Inggeris (Sivil) dan undang-undang Syariah yang menggantikan undang-undang Inggeris dalam beberapa perkara dan kes. Sistem pemerintahan di Negara Brunei Darussalam ditetapkan oleh perlembagaan yang berdasarkan konsep Melayu Islam Beraja (MIB). Dari konsep ini, ia membawa kepada tiga komponen iaitu MIB yang menjadikan kebudayaan *Melayu*, agama *Islam* dan system politik dibawah pemerintahan *Beraja* sebagai identiti Negara Brunei Darussalam. Konsep ini juga dijadikan sebagai falsafah negara, serta menjadi sumber rujukan, garis pandu dan calak dalam pembinaan negara.

Di samping mencapai matlamat Wasasan Negara 2035, Negara Brunei Darussalam juga mempertahankan ketakwaan kepada Allah Subhanahu Wata'ala dengan menjadikan Negara Brunei Darussalam sebagai sebuah Negara Zikir sebagaimana visi Baginda Sultan Haji Hassanah Bolkihah yang telah dititahkan sempena Hari Raya 'Aidil Adha pada tahun 1428 Hijrah bersamaan dengan tahun 2007 Masihi yang menjadi azam suci untuk menjadikan Negara Brunei Darussalam sebagai sebuah Negara Zikir. Antara lain titah baginda:

*"Pada hemat beta, tidaklah berlaku sesuatu ini melainkan ada dengan sebab-sebabnya, termasuklah segala fenomena kejadian di muka bumi ini, ia tidak berlaku dengan sendirinya, sebagaimana yang disangkakan oleh setengah pihak.*

*Ia berlaku dengan kehendak Allah jua, supaya timbul rasa insaf di hati manusia dan segera akan bertauat kepada-Nya. Ini dia hikmah di sebaliknya kejadian-kejadian pahit tersebut.*

*Kalaulah kita mahu untuk mengambil pengajaran daripadanya, nescaya ada harapan untuk kita akan selamat daripada sebarang malapetaka, berdasarkan Allah itu sangatlah menyayangi para hamba-Nya yang ta'at dan membenci mereka yang derhaka.*

*Perkara ini, rasa-rasanya telah pun menjadi kenyataan kepada kita di bumi yang bertuah ini, Negara Brunei Darussalam, di mana dengan kurnia Allah jua, kita telah dan sedang menikmati keamanan, keselamatan dan kemakmuran yang berpanjangan, yang tidak dinikmati oleh orang lain.*

*Kerana itu, azam beta adalah semakin kuat, untuk menjadikan Brunei Darussalam ini benar-benar sebuah 'Negara Zikir' yang mendaulatkan hukum dan undang-undang syariat Allah di dalamnya, dengan akhlak mulia menjadi pakaiannya, di samping juga pandai menghormati jiran dan ikhlas menghulurkan tangan kepada semua sahabat dan rakan di seluruh jagat ini”.*

Melalui petikan titah ini, menjelaskan bahawa Negara Brunei Darussalam adalah sebuah negara yang tidak memandang remeh atas semua perkara, tanpa mengira sama ada perkara tersebut berkaitan dengan individu, masyarakat, negara, kehidupan, bangsa, agama, pendidikan, ekonomi, undang - undang dan sebagainya.

Pencapaian amalan kualiti yang cemerlang mampu menjadi salah satu tonggak kepada penentuan kejayaan dalam persaingan produk. Malahan, amalan kualiti menyeluruh perlu diterapkan bermula daripada fasa input, pemprosesan hinggalah produk sampai ke tangan pengguna. Merujuk kepada (Heizer dan Render, 2006), pengurusan saintifik yang dijalankan oleh para pengkaji terdahulu banyak memberi sumbangan asas kepada kewujudan pemikiran ke arah penambahbaikan kualiti yang bermatlamatkan kepada kepuasan pelanggan. Pada masa yang sama juga, pelaksanaan pengurusan kualiti menyeluruh mampu menjamin keberkesanan dan kecekapan pengurusan organisasi ketika mengendalikan operasi dan seterusnya memperbaiki prestasi organisasi. Manakala, bagi industri makanan, aspek keselamatan dan kesihatan juga tidak boleh dipandang mudah dalam sesuatu proses pengeluaran terutamanya dalam aktiviti pemprosesan produk makanan yang berkualiti serta selamat. (Lokman, 2008).

Dalam kajian (Azmidah binti Abdullah, 2015) yang bertajuk: Faktor-Faktor Yang Mempengaruhi Niat Pengguna Memilih Ubat-Ubatan Halal yang telah dijalankan di UUM (Universiti Utara Malaysia) telah menerangkan bahawa kesedaran tentang pentingnya memilih ubat-ubatan halal dikalangan masyarakat masih rendah bahkan pengaruh sikap, keluarga dan rakan-rakan serta pengetahuan adalah mempunyai kecenderungan terhadap niat pengguna dalam memilih ubat-ubatan halal dan tidak tertumpu kepada isu-isu terhadap halal haram bahan-bahan yang digunakan dalam produk-produk yang dijual bagi meningkatkan tahap keselamatan dan kesihatan si pengguna yang berlandaskan kepada undang-undang di Malaysia.

Dalam kajian (Nor Aini Haji Idris, 2013) pula yang bertajuk: Analisis Keprihatinan Pengguna Muslim Terhadap Isu Halal Haram Produk Melalui Pembentukan Indeks telah menfokuskan tentang kurangnya kesedaran mengenai isu halal dan haram dalam pelbagai produk yang dijual bahkan juga menegaskan tentang isu penggunaan logo halal palsu dalam produk makanan dan kesihatan di Malaysia. Namun kebelakangan ini banyak timbul keraguan dalam kalangan pengguna Islam tentang status halal produk. Dengan kata lain, pengguna Islam semakin terdedah dengan pelbagai produk yang disyaki dicampur dengan unsur-unsur yang haram di sisi Islam.

Hal yang demikian, adalah merupakan salah satu usaha pihak kerajaan Negara Brunei Darussalam dalam membendung penulatan isu produk yang tidak diiktiraf dan dilarang penjualannya serta penggunaannya di Negara Brunei Darussalam. Usaha ini adalah bersesuaian dengan Wawasan Kementerian Kesihatan Negara Brunei Darussalam iaitu “*Bersama Ke Arah Warga Sihat*”.


Bertitik tolak daripada hal itu, setiap masyarakat haruslah menyedari akan kepentingan mematuhi peraturan-peraturan yang telah ditetapkan oleh kerajaan di samping sama-sama membantu pihak kerajaan dalam membantu mencapai tujuan dan keutamaan Kementerian Kesihatan iaitu “*untuk meningkatkan kesihatan dan kesejahteraan rakyat dan penduduk Negara Brunei Darussalam melalui sistem penjagaan kesihatan berkualiti tinggi dan komprehensif, efektif, efisien, responsif, mampu dibiayai, saksama dan mudah diperolehi oleh semua di negara ini*” di samping “*untuk menjadikan kesihatan adalah tanggungjawab semua, meningkatkan kualiti penyampaian perkhidmatan serta mencegah dan mengawal penyakit-penyakit tidak berjangkit*”.

Sehubungan dengan itu, kajian ini dijalankan dengan tujuan untuk meneliti peranan setiap agensi kerajaan yang terlibat dalam menangani isu produk tegahan dan memudaratkan khususnya produk kecantikan dan kesihatan. Melalui kajian ini juga, pengkaji akan mengkaji fungsi penerapan undang-undang serta akta yang digunapakai dalam mengawal kemasukan dan penjualan produk yang dilarang untuk dijadikan sebagai sumber rujukan dan menambah kesedaran masyarakat akan kesalahan ke atas pengimportan, pendaftaran, promosi iklan, percubaan klinikal, pengangkutan, pengilangan, penyimpanan, pendispensan dan penjualan produk ubat dan produk kosmetik menurut undang-undang Negara Brunei Darussalam.

## **Metodologi Kajian**

Dalam bab ini, metodologi kajian merujuk kepada bagaimana kajian ini dijalankan. Pengkaji telah menggariskan beberapa metodologi tertentu selaras dengan tajuk yang dipilih iaitu dengan menggunakan kaedah kualitatif. Dalam bab ini, pengkaji akan membincangkan secara ringkas reka bentuk kajian yang akan digunakan, bagaimana data akan dikumpulkan serta membincangkan populasi serta teknik persampelan yang terlibat dalam mengenalpasti informan atau responden kajian. Selain itu, pengkaji juga akan menjelaskan mengenai instrumen, prosedur kajian dan analisis data secara ringkas.

Pengkaji juga telah mengadaptasi model KIPP ini untuk membina satu kerangka konseptual pembinaan instrumen yang menggambarkan hubungan antara *konteks-input-proses-produk*. Rajah 1 menunjukkan kerangka konseptual yang digunakan dalam kajian ini.




**Rajah 1:** Kerangka konseptual yang digunakan dalam kajian ini

Dalam kajian ini, pengkaji menggunakan kaedah kualitatif. Menurut (Moleong, 2007) bahawa kualitatif adalah penelitian yang bermaksud untuk memahami fenomena tentang apa yang dialami oleh subjek penelitian misalnya perilaku, perspsi, motivasi, tindakan dan lain-lain, secara holistik dan dengan cara deskripsi dalam bentuk kata-kata dan Bahasa, pada suatu konteks khusus yang alamiah dan dengan memanfaatkan berbagai metod alamiah.

Data kajian diperolehi melalui empat (3) sumber iaitu melalui kaedah kajian perpustakaan, kaedah temubual yang dijalankan dengan menemubual beberapa pegawai daripada agensi-agensi kerajaan dan bukan kerajaan yang bertanggungjawab dalam mengawalselia produk kecantikan dan kesihatan di Negara Brunei Darussalam. Kemudian kaedah analisis dokumen yang mana data dianalisis, setelah dapatan dari temubual selesai ditranskrip.

Di dalam sesi temubual juga, pengkaji akan merakam perbualan dengan menggunakan aplikasi rakaman yang terdapat di dalam telefon bimbit atau rakaman yang terdapat di dalam aplikasi *zoom* untuk memudahkan pengkaji mentranskrip semula setiap perbualan untuk dianalisis. Temubual biasanya dilaksanakan dengan cara yang berbeza mengikut kegemaran dan keperluan pengkaji. Ia boleh dikategorikan kepada tiga jenis, iaitu temubual berstruktur, temubual semi-struktur dan temubual tidak berstruktur. Bagi memudahkan pengkaji untuk mendapatkan maklumat yang baharu, dan soalan-soalan lain yang berkaitan dengan tajuk kajian mungkin akan ditambah semasa sesi temubual. Dari itu, pengkaji akan menggunakan kaedah temubual berstruktur, yang mana kaedah ini akan memudahkan pengkaji untuk bertanyakan soalan-soalan mengikut keperluan kajian yang telah disediakan. Sampel juga diberikan hak kebebasan untuk bercerita bagi mengkongsikan maklumat yang lebih lagi bagi membantu mencapai objektif kajian.

Proses pengumpulan data bagi kualitatif adalah seperti berikut:



## Dapatan Kajian

Berdasarkan kajian yang telah dijalankan, dalam proses penelitian dan penilaian bahan-bahan yang terkawal bagi setiap produk kecantikan dan kesihatan, Jabatan Kastam dan Eksais Diraja (JKED) dan juga Kementerian Kesihatan adalah agensi-agensi kerajaan yang sangat mengambil peranan dalam mengawalselia produk-produk yang bakal dijual di negara ini.

Dengan adanya Tekad Pemeduliaan (TPOR) yang telah ditetapkan dimana JKED mengambil masa kira-kira purata dalam 30 minit bagi satu borang deklarasi yang tertakluk kepada bahan-bahan yang dinyatakan. Bagi permohonan notifikasi produk kosmetik adalah 8 hari berkerja sementara TPOR bagi permohonan kebenaran mengimport bagi produk suplemen kesihatan adalah 21 hari berkerja di Kementerian Kesihatan. Berdasarkan kepada agensi-agensi bukan kerajaan yang telah terpilih untuk menjadi responden dalam kajian ini, rata-rata telah mengatakan bahawa proses penelitian mengambil jangka masa 285 hari bekerja iaitu tidak lebih dari 1 tahun untuk mendapatkan penilaian yang teliti dan sah bagi mengawalselia bahan-bahan yang boleh memudaratkan orang ramai.

Penggunaan media sosial yang sangat meluas pada masa kini memang tidak dinafikan banyak menyumbangkan kebaikan dari keburukkan terutamanya bagi penjual produk mereka dari aspek teknik pemasaran. Tetapi, ianya juga boleh mendatangkan keburukkan atau isu yang mana kedua-dua kumpulan responden memberi peringatan agar orang ramai untuk sentiasa berhati-hati dan melaporkan jika ada sebarang keraguan dalam iklan-iklan yang telah dipaparkan kerana adanya beberapa penjual yang tidak mendaftarkan produk yang dijual untuk diproses keselamatan dan kehalalannya. Bukan itu sahaja, menurut Kementerian Kesihatan, terdapat juga beberapa produk yang dibenarkan di pasaran di negara ASEAN lain akan tetapi tidak mendapat kebenaran di negara ini disebabkan oleh bahan campuran yang tidak disyihar dengan bahan yang tidak dibenarkan.

Dalam menangani isu produk dan kesihatan di negara ini, Pasukan Polis Diraja Brunei (PPDB) akan memastikan setiap laporan akan dibuat bagi setiap operasi yang dijalankan dan siasatan lanjut akan dijalankan oleh PPDB dengan diperbantukan oleh 'Laporan Pakar' daripada pihak Kementerian Kesihatan. Ianya agar dapat menambah lagi kefahaman pegawai penyiasat (PPDB) tentang kes berkenaan dan menguatkan kes. Kementerian Kesihatan juga akan membuat pemantauan dan pemeriksaan dipremis-premis penjualan produk-produk yang berkenaan termasuk kedai-kedai, expo-expo jualan, pameran dan sebagainya. Menyediakan garispandu-garispandu yang berkenaan di dalam laman sesawang Kementerian Kesihatan agar memudahkan orang ramai secara amnya, penjual secara khususnya untuk mengambil peduli tentang isu-isu semasa dan juga peraturan-peraturan yang patut dipatuhi dalam penjualan produk-produk mereka terutamanya prosedur-prosedur yang telah ditetapkan dan juga hukuman-hukuman denda bagi kesalahan-kesalahan yang dibuat mengikut Perintah Ubat 2007.

Bagi tempoh proses yang perlu diambil oleh pihak kementerian Kesihatan dalam menjalankan prosedur yang perlu dipatuhi di mana para pengimport dan pengusaha produk kosmetik diberikan tempoh waktu 'grace period' selama 3 tahun sebelum ianya dilaksanakan secara penuh pada tahun 2011. Bagi produk kesihatan pula, prosedur pengawalan telah menggunakan Akta Racun bagi mengawal pengimportan dan penjualnya di Negera Brunei Darussalam di bawah peraturan Perintah Ubat. Pada masa kini, Bagi produk kosmetik, Peraturan Ubat (Produk Kosmetik), 2007 adalah berdasarkan *ASEAN Cosmetic Directive* (ACD), bahkan prosedur yang digunakan bagi produk suplemen kesihatan adalah '*Guideline for application for importation and/or sale of traditional medicine and health supplement*'.

Dapatan kajian juga mendapati bahawa Pasukan Polis Diraja Brunei, Jabatan Kastam dan Eksais Diraja dan juga Brunei Darussalam Food Authority, Kementerian Kesihatan adalah Agensi kerajaan yang terlibat dalam mengawalselia produk yang masuk ke Negara Brunei Darussalam. Bagi perkara mengawalselia Produk Kecantikan dan Kesihatan, maklumat-maklumat risikan daripada orang ramai atau secara tular di media sosial dan agensi bukan kerajaan adalah memainkan peranan penting dalam menguatkan kerjasama di antara agensi-agensi yang berkepentingan yang telah ditetapkan oleh pihak Kerajaan dengan menjalankan pemeriksaan dan operasi sepadu di premis-premis perniagaan yang dipercayai telah menjual produk yang tidak berdaftar dan dipercayai akan keraguannya dari segi keselamatan dan juga kehalalannya bagi orang ramai untuk menggunakannya. Pihak Kementerian Kesihatan (melalui Lembaga Perubatan Brunei atau lebih dikenali dengan '*Brunei Medical Board*') yang selalunya giat membuat pemantauan dan penyiasatan awal ke atas aktiviti-aktiviti yang menyalahi undang-undang berkaitan produk kecantikan dan kesihatan dan apabila maklumat tersebut dipercayai sah, kemudian pihak Kementerian Kesihatan akan memanggil pihak Pasukan Polis Diraja Brunei (PPDB) untuk membincangkan dan membuat Pelan Operasi (bersama agensi yang berkepentingan) bagi mengadakan Operasi Sepadu dan menjalankan siasatan ke atas pesalah-pesalah yang berjaya ditahan.

Dapatan kajian ini menunjukkan bahawa tindakan yang paling sesuai yang perlu diambil kepada pesalah yang melanggar segala peraturan dan undang-undang yang telah ditetapkan adalah bagi yang didapati telah menerbitkan, mengeluarkan iklan, perlambangan atau imej yang palsu dan mengelirukan yang berkaitan dengan produk perubatan adalah bersalah di bawah Seksyen 52 Perintah Ubat 2007 dan boleh dihukum dengan denda sebanyak BND 5, 000, penjara selama tempoh tidak melebihi dua tahun atau kedua-duanya manakala, di bawah Akta racun, Penggal 114 adalah menjadi satu kesalahan untuk menjual mana-mana produk yang mengandungi bahan yang dikawal di bawah akta berkenaan dan boleh dikenakan denda sebanyak BND 8, 000 atau penjara selama enam bulan, jika didapati bersalah. Adapun

jika seseorang melakukan sesuatu di atas kecuaiannya sendiri yang membahayakan atau mungkin membahayakan nyawa manusia, jika didapati bersalah, akan didenda sebanyak BND 16, 000 dan dua belas (12) bulan penjara.

Selain itu, adalah menjadi satu kesalahan di bawah Peraturan Ubat (Produk Kosmetik) 2007 untuk mengimport dan memasarkan produk kosmetik di pasaran tempatan tanpa Surat Pengakuan Notifikasi Produk Kosmetik yang dikeluarkan oleh Pihak Berkuasa di Kementerian Kesihatan. Adalah juga menjadi satu kesalahan, di bawah Seksyen 11 Peraturan Ubat (Produk Kosmetik) 2007, untuk mengiklankan produk-produk kosmetik dengan tuntutan bahawa produk kosmetik tersebut mempunyai manfaat terapeutik atau tuntutan yang akan mewujudkan kesan salah mengenai kandungan, kualiti atau keselamatan produk kosmetik tersebut dan boleh dikenakan denda tidak melebihi BND 5, 000, penjara tidak melebihi dua puluh (20) tahun atau kedua-duanya sekali.

## **Kesimpulan**

Secara keseluruhannya, pihak agensi kerajaan dan agensi yang bukan kerajaan adalah pihak yang sangat penting dalam memastikan undang-undang yang telah ditetapkan di negara ini untuk mengawal pengaruh globalisasi yang memberi impak besar kepada sikap dan pandangan setiap individu. Bagaimanapun menyalahkan pengaruh tertentu tanpa mengambil tindakan yang sewajarnya tidak dapat membantu menyelesaikan masalah. Setiap pihak yang berkaitan perlu memainkan peranan masing-masing semaksimum mungkin. Pemantauan dan pembaikan seharusnya sentiasa dilakukan terhadap dasar atau langkah yang dijalankan untuk memastikan produk-produk yang dipasarkan sentiasa berada dilandasan yang betul. Usaha-usaha kesedaran kepada orang ramai ini perlu dipertingkatkan. Mereka perlu didedahkan dengan kesempurnaan yang menuju ke arah jalan kehidupan yang sihat dan selamat.

Sehubungan itu pengkaji berharap dapatan daripada kajian ini dapat dijadikan sumber rujukan oleh pihak-pihak tertentu untuk mengenalpasti sejauh mana isu produk kosmetik dan kesihatan di negara ini dan juga kepada pengkaji lain dalam menjalankan kajian penyelidikan tindakan yang mempunyai kaitan dengan isu dan hasil kajian ini. Selain sebagai rujukan, kajian tindakan ini juga boleh dijadikan sebagai kajian lanjutan bagi penyelidik yang ingin mengkaji isu kajian ini dari prospek yang berbeza contohnya, menggunakan variabel yang berbeza yang menfokuskan kepada isu rantai bekalan produk kosmetik dan kesihatan di Negara Brunei Darussalam. Bukan itu saja, pengkaji yang akan datang boleh menambahbaikkan kajian dari sudut kaedah pengumpulan data, dimana dalam kajian ini, kualitatif sahaja telah digunakan iaitu dengan kaedah temubual berstruktur. Demikian, kombinasi penggunaan kualitatif dan kuantitatif untuk kajian lanjutan ini boleh memberikan hasil kajian yang padat.

## **Rujukan**

### **Buku**

Heizer, J. dan B. Render. 2006. *Operation Management: Pearson International Edition*. Eight Edition. Pearson Education. United State of America

### **Tesis**

Azmida binti Abdullah. 2015. *Faktor-Faktor Yang Mempengaruhi Niat Pengguna Memilih Ubat-Ubatan Halal*. Universiti Utara Malaysia.

Nor Aini Haji Idris. 2013 *Analisis Keprihatinan Pengguna Muslim Terhadap Isu Halal Haram Produk Melalui Pembentukan Indeks*. Pusat Pengajian Ekonomi: Fakulti Ekonomi Dan Pengurusan, Universiti Kebangsaan Malaysia

Jurnal

Moleong. 2007. *Metodologi Penelitian Kualitatif*, Remaja Karya, Bandung.

Rabiatul Nalawiyah & Intan Suraya. *Isu Produk Kecantikan Dan Kesehatan*. 2007. Shah Alam: Malaysia

Prosiding

Lokman Ab Rahman. 2008. Shariah and Malaysia Halal Certification System. Pembentangan Kertas Kerja *Seminar Halal Food*. Universiti Sains Islam Malaysia.